

18 DEC 1996

Mahathir-tebusan

MAHATHIR YAKIN KERAJAAN PERU BERUSAHA AGAR TEBUSAN DIBEBAS

KUALA LUMPUR, 18 Dis (Bernama) -- Datuk Seri Dr Mahathir Mohamad melahirkan keyakinan kerajaan Peru akan berusaha sedaya upaya bagi memastikan beberapa diplomat asing termasuk duta Malaysia di negara itu, yang ditawan oleh sekumpulan gerila sebagai tebusan di Lima, dibebaskan.

"Kita amat memandang berat.....mereka (kerajaan Peru) adalah rapat dan jujur dengan kita. Jadi, saya agak pasti mereka akan melakukan sesuatu yang terbaik", kata Perdana Menteri kepada pemberita di sini hari ini.

Dr Mahathir berkata beliau telah diberi penerangan mengenai kejadian itu oleh Wisma Putra sebaik sahaja kejadian itu diketahui.

Katanya, kerajaan akan melakukan apa yang boleh, jika keadaan memerlukan.

Duta Malaysia di Peru, Datuk Ahmad Mokhtar Selat, merupakan antara 200 tebusan yang ditawan gerila bersenjata di kediaman Duta Jepun di Lima pagi tadi.

"Buat masa ini, kita hanya tengok sahaja apa yang sedang berlaku," katanya.

Dr Mahathir berkata apa yang beliau ketahui hanya duta Malaysia sahaja yang terlibat dalam kejadian tersebut.

Katanya, beliau sedang mengikuti perkembangan itu menerusi Wisma Putra yang akan menilai keadaannya.

Kerajaan buat masa ini belum bercadang untuk menghantar pegawai Wisma Putra ke Peru, tambahnya.

Dr Mahathir berkata perkara seperti ini kadang-kadang terjadi dan menurutnya kejadian seumpama itu telah berlaku di Algeria tetapi "diplomats kita selamat".

"Tapi diplomat hadapi masalah seperti ini walaupun tidak kerap kerana kita ada hubungan yang baik dengan negara lain," kata beliau.

-- BERNAMA

ES OBA